

DEC 11 2025

IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS

ASSISTANT CLERK OF COURTS
REPUBLIC OF THE MARSHALL ISLANDS

KITA and MILTON ZACKIOS Riabnono, v. ANNA CARMEL/WINTON LOMOT, Rijumae Abnono.	CIVIL ACTION NO. 2023-00047 <u>JEMLOK & UAK EO AN</u> <u>COURT EO AN MANIT</u>
--	--

Nan: Hon. Anne Bodley, Associate Justice eo an High Court
Mr. David M. Strauss, Counsel eo an Riabnono ro
Mr. Tiba Karotu, Assistant Public Defender, Counsel eo an Rijumae Abnono eo

I. Naan in Kopellok

Case in ej jebat jen iakwelel eo ikijen maron eo an *senior dri jermal* ilo juon ian melan ko ilo Lomelan Weto ilo bukwon in Rairok, aelon in Majuro, Republic eo an Marshall Islands (“Lomelan”). Riabnono rein, Kita im Milton Zackios, rej ba bwe maron eo an *senior dri jermal* ilo tu-iaar in Lomelan ear bed ibben lollap eo jemen Kita, Lawrence Kumtak, im kin menin, ej aikuij kio etal nan ibben kora eo nejin erittotata, Kita. Botap, Rijumae Abnono Winton Lomot, eo im ear bok jikin *alap* eo moktalok im ear rijumae eo jinoin ilo case in, Anna Carmel, ej ba bwe maron kein jimor an *alap* im *senior dri jermal* rej an *bwij* eo ilo Lomelan. Kin un in, ej ba bwe Neti Bale Lomot ej aikuij kar e eo ej kabwijer maron eo an *senior dri jermal*, ejjab Riabnono Kita Zackios, eo im ejjab mottan *bwij* eo aer ilo Lomelan.

II. Kajitok / Unin Iakwelel Eo ilo Case in

Emoj letok eddo eo nan Court in bwe en etale im komman an jemlok kake won eo ikotaan Riabnono Kita Zackios im Neti Bale Lomot (Rijumae Abnono Winton Lomot ej na-aenikien), ejimwe im ekkar bwe en kabwijer maron eo an *senior dri jermal* ilo juon ian melan ko

ilo Lomelan. Court in, einwot kemlet ilo Jemen-ei eo, ej aikuij komman an jemlok bedbed ion manit im iminene ko ad ilo aelon kein. RMI Jemen-Ei, art. 6, §4.

Kin un kein emoj laajraki lal, Court ij loe bwe Riabnono Kita Zackios ej armij eo ejimwe im ekkar bwe en kabwijer maron eo an *senior dri jermal* ilo melan eo emoj kalikare ilo Lomelan im lollap eo jemen, Lawrence Kumtak, ear kabwijer maron eo ie.

III. Iakwelel ko an Pade ko

A. Melele ko remool emoj erra kaki

Pade kein jimor rej erra kin melele in ke *Iroiylaplap* eo an Lomelan ej *Leroij* Esther Zedkaia im ej kile Riabnono Kita einwot armij eo ej kabwijer maron eo an *senior dri jermal* ilo juon ian melan ko ilo Lomelan. Pade kein jimor rej bareinwot erra kin melele in ke Rijumae Abnono Winton ej *alap* eo rainin an Lomelan einwot juon eo ear bok jikin *Alap* Anna Carmel.

B. Abnono eo an Lomot

Rijumae Abnono Winton Lomot ej ba bwe maron eo an *senior dri jermal* ilo Lomelan ear etal nan lollap eo jemen Riabnono eo, Lawrence Kumtak, jen ibben lollap eo jimaan, *Alap* Labwille, ilo an *bwij* eo jab erra kake. Kin un in, ej ba bwe juon ajelok eo im bwij eo ejjab erra kake ej wor kitien wot ilo torein mour eo an rijolet eo. Ej bareinwot ba bwe *Iroiylaplap* eo an Lomelan ear erra kake ajelok eo an jikin in ilo Lomelan nan Lawrence Kumtak im lollap ro ruo moktalok jen e, Branij im Lemejeik. Ej ba bwe ilo aolepen ajelok kein jilu, *bwij* eo ear jab erra ibben. Im enin ej un eo ej ba bwe maron eo an *senior dri jermal* im Lawrence Kumtak ear kabwijer e, ilo tore eo ej jako ilo kilaan mej, en rool lok nan bamle eo an Labwille. Kin menin, armij eo ejimwe im ekkar bwe en kabwijer maron eo an *senior dri jermal* rainin jen bamle eo an Labwille, ekkar nan e, ej Neti Bale Lomot.

Rijumae Abnono Winton ej bareinwot ba bwe ijelokin ro rar kabwijer maron mokta lok jen e – Lawrence Kumtak, Branij, im Lemejeik – Kita ej juon eo elikjab ilo an ejelok kile nan e jen *alap* im *Irojlaplap* ro jimor einwot juon eo ej kabwijer maron eo an *senior dri jermal* ilo juon ian melan ko ilo Lomelan – kile eo nan e einwot juon *senior dri jermal* ej jen ibben *Irojlaplap* eo wot. Im kin un in, Rijumae Abnono Winton ej ba ej aikuij bojrak im ejelok kitien abnono in an Riabnono Kita.

C. Abnono eo an Zackios

Riabnono Kita ej ba bwe maron eo an *dri jermal* ear etal nan bamle en an jen tore eo pepa eo an 1959 Land Determination eo ear kabin im kalikar etan Lemejeik einwot juon eo ej kabwijer maron eo an [*senior*] *dri jermal* ilo Lomelan. Ekkar nan Kita, etan *Iroj Aisea* im *Alap Bale* rej bareinwot alikar einwot an alikar etan Lemejeik ke rej kabwijer maron ko jilu ilo Lomelan. Ej ba bwe eo ear bok jikin Lemejeik tokelik ej Branij, im eo ear bok jikin Branij ej lollap eo jemen, Lawrence Kumtak. Kita ej bareinwot ba bwe jen tore eo an Lemejeik, *aolep Irojlaplap* ro einwot – *Iroj Aisea*, *Irojlaplap Amata*, *Leroij Atama*, *Irojlaplap Jurelang*, *Irojlaplap Lein* im kio *Leroij Esther* - koba *alap* ro einwot – *Alap Bale*, *Alap Labwille*, im *Alap Dick Carmel* – rar *aolep* kile bamle eo an einwot ro rej kabwijer maron eo an *senior dri jermal* ilo melan eo tu-iaar in ial en ilo Lomelan. Im ekkar nan e, emoj an mootlok 60 jima iio jen tore eo an Lemejeik ak ejelok kar abnono jen bamle eo an *alap* mae tore in im ej walontak abnono in elkin an komman case in ilo 2023 eo.

Riabnono Kita ej bareinwot ba bwe alap eo ear kabwijer maron mokta lok jen Rijumae Abnono eo, *Alap Labwille*, ear erra im droor eltan pein ilo juon koon nan kojerbal bwidej ilo etan [*senior*] *dri jermal* eo an Lomelan einwot an kar droor naan in “for” iturin ijo ear sign ikijen *senior dri jermal*, nan kalikar im kojenoloke jen ijo ear sign einwot juon eo ej kabwijer maron eo

an *Alap*. Ej bareinwot ba bwe *Alap* Winton, ear bed im mour ilo United States (US) ak Amedka iumin elon iio ko, im ejelok an melele kin karokan bwidej kein im rar kajolet ro mokta lok jen e - Lemejeik, Brani, im Lawrence – kin maron eo an *senior dri jerbals* ilo juon ian melan ko ilo Lomelan ilo torein mour ko aer. Melele ko ej kwalok i ikijen an ba bwe maron eo an *senior dri jermal* ilo Lomelan en rool nan bamle eo an, ekkar nan Kita, rej jet melele ko ejelok bedbedier im *Iroijlaplap* en ejjab erra kaki.

Ekkar nan Kita, Rijumae Abnono Winton ear likjab in lemaantak kein kamool ko rej rie melele ko an ilo an ba bwe maron eo an *senior dri jermal* rar ajelok nan ro mokta lok jen e bwe ren kabwijer e ilo wot toren mour ko aer kajojo. Ijowotke, ej ba bwe jen ke ear komman pepa in, 1959 Land Determination eo, elon pepa ko rej kalikar karkan kojerbal bwidej ko im pepa ko aiorlokwoit im rej rie melele ko an ilo an ba bwe maron eo an *senior dri jermal* ear bed ibben bamle eo an iumin 60 jima iio kio. Einwot juon eo ej bok jikin lollap eo jemen, ej ba bwe e eo ejimwe im ekkar bwe en kabwijer maron eo an *senior dri jermal* ilo juon ian melan ko ilo tu-iaar in Lomelan.

IV. Etale Melele Ko Remool

Einwot ke Court in ej aikuij komman an jemlok bedbed ion manit im iminene ko ad aelon kein, melele ko remool jen pade kein ikijen manit im manit ko emoj aer eorom kakien rej alikar ilo jermal in etale eo ijin. Emoj an Supreme Court eo ba bwe manit ko im emoj aer eorom kakien ekkar nan wawein im jekjek kein jej mour kaki rainin rej manit ko im emoj aer kabine ilo nememein kakien, ak ko kojerbali einwot bedbed in juon jemlok eo jen jikin ekajet eo. *Lobo v. Jeho*, 1 MILR (Rev.) 22, 227 (1/2/1991) ilo 226.

A. Mantin Majol Ko Rejelet Case in

1. *Imon bwij – juon bwidej, ene ak aeto im emoj kalikar ke ej jikin jolet an ro nejin kora ak ro ilo bwij eo. Ejelok an alap eo maron, ilo an make im ejelok an kojela kake, jolok maron in*

jolet ko an ro ilo bwij eo. Tobeller v. David, 1 MILR (Rev.) 81, 82 (4/6/1987); *Jack v. Hisaiah*, 2 MILR 206, 209 (12/23/2002) ilo 209.

2. *Imon aje – juon bwidej, ene ak aeto eo emoj aje einwot juon jolet, imon wia, ak wawein ko jet ikijen karkan ajelok ko ilo bwidej kommani iumin Mantin Majol. Maron eo nan komman karkan ajelok ko ilo bwidej ebed ibben ro rej kabwijer maron ko ilo bwidej einwot – Iroiylaplap, ak Iroi-edrik eo ne enej ekkar, alap eo, im senior dri jerbal eo. RMI Const. art. X, §1(2).*
3. *Mantin Jela Nae Dron – manit eo in, ilo an ekkar, ej kemlet bwe juon eo ej maron ion bwidej eo ej aikuij kojelaik im kautej maron ko jet ilo an komman karokan jemlok ko im renej jelet bwidej eo ak armij ro ie, ak aolepeir. Jorbon v. Akira*, CA 2020-00329, (Opinion & Answer of the TRC, 1/11/2022); *Jorbon v. Michael and Laelang*, Civil Action 2023-01720, (Opinion & Answer of the Traditional Rights Court, 6/27/2025).
4. *Jab Komakit Drekein Jenme Eo – emo iun ak komakit drekein jenme eo ej bedbed in juon karokan bwidej eo emoj an komman. Thomas v. Samson v. Alik*, 3 MILR 71, 75 (7/24/2008).

B. Etale Melele Ko

1. Iumin Mantin Majol, maron eo nan komman karokan ajelok ko ilo bwidej ebed ibben ro rej kabwijer maron ko ilo bwidej eo. (RMI Jemen-Ei art. X, §1(2)). Court in ej kile an pade kein jimor erra ke *Leroij Esther Zedkaia* ej *Iroiylaplap* eo rainin an Lomelan, im Rijumae Abnono Winton Lomot ej *Alap* eo. Ilo an wor tarbok ikotaan pade kein ikijen maron eo an *senior dri jerbal*; pade kein rej aer eddo nan kamool iakwelel ko aer jen dron. Riabnono ro ej aikuij kamool ke maron eo an *senior dri jerbal* kar maron kabine im ajelok nan ro jimaan im rar kabwijer maron moktalok jen Riabnono Kita. Ejja ilo wawein in wot, Rijumae Abnono eo ej aikuij kamool ke ajelok eo nan bamle eo an Riabnono Kita ear juon karkan ajelok bwidej eo ear jab bin im an jidrik wot ien im bwe Neti Bale Lomot ej e eo jen *bwij* eo ejimwe im ekkar bwe en kabwijer maron eo an *senior dri jerbal*, ejjab Riabnono Kita.
2. Ekkar nan manit im iminene ko ad ilo aelon kein, maron im eddo eo ebed ibben *alap* eo nan lale im kojbarok bwidej eo einwot juon jeban bwij. *Rusin v. Jeilar, et al.*, CA 2023-0393 (Lomnak & Uaak eo an Court eo an Mani, 11/08/24); *Lelwoj v. Helies and Samson*, Civil

Action No. 2023-01257, (Lemnak & Uwak eo an Court eo an Mani, 3/17/25) at 5; *Peter v. Napking, et al.*, CA 06-163, (Lemnak in Uwak, 9/16/08). Maron im eddo in ekoba komman karkan laajrak in bwidej eo ekkar nan aikuij im jermal ko kajojo, einwot kojenolok jikin an ro uan bwij eo jukjuk im amnak, jikin wia, ak jikin ko emoj komman aer koon nan kojerbali. *Lelwoj*, supra ilo 5.

3. Maron im eddo ko an juon alap ekka aer komman ilo an wor enaan lok im kabilok jen ro jet im rej kabwijer maron ko jet einwot - *Iroiylaplap*, ak *Iroi-edrik* ijoko ekkar, im *senior dri jermal* – ekkar nan mantin jela nae dron eo ej kemlet bwe maron ko jilu aolep rej aikuij erra kin juon karkan laajrak in bwidej, elaptata juon eo im ej komman oktak ilo tore en ej komman. *Lelwoj*, supra; *Jorbon v. Akira*, CA 2020-00329, (Lemnak & Uaak eo an Traditional Rights Court, 1/7/2022); *Jorbon v. Michael and Laelang*, Civil Action 2023-01720, (Lemnak im Uak eo an Court eo an Mani, 6/14/2025); *Tokjen v. Lodge-Lobju and Lodge-Ned*, CA 2018-00294, (Lomnak & Uaak eo an Court eo an Mani, 10/2/2023).
4. Court in ej loe bwe ewor mottan ko ilo melan Lomelan im emoj karok bwe ren *imon aje* ilo kilaan wia kake ak ilo an wor karokan koon ko nan kojerbali, im rej alikar ilo kein kamool ko an Riabnono einwot P-4 (juon koon in 2004 eo kotaan ro aer Lomelan - Atama Zedkaia, Labwille Carmel, im Lawrence Kumtak – ibben Hsueh Ming-Lin), P-6 (juon koon in 2011 eo kotaan ro aer Lomelan - Jurelang Zedkaia, Dick Karmel, im Lawrence Kumtak – ibben Hsueh Ming Lin), P-7 (juon melim nan loan ikijen ekkal em ikotaan ro aer Lomelan - Amata Kabua, Labwille Carmel, im Branij Lautrok – ibben Milton Zackios), P-8 (juon koon in 1995 eo kotaan ro aer Lomelan - Amata Kabua, Labwille Carmel, im Labwille Carmel ilo etan *senior dri jermal* eo – ibben Milton im Kita Zackios), im P-19 (juon Kalimur an Mrs. Carmen M. Bigler ikijen maron eo an *senior dri jermal* eo ear wiiki jen ibben *Leroij* Atama im *Alap*

Labwille, bwe en etal nan likao ro ruo nejin ne enaj jako ilo kilaan mej). Kein kamool eo, Exhibit P-8, ej kalikar lok im rie melele ko an Riabnono Kita ilo an ba bwe *alap* eo ear droor eltan pein im sign ilo etan *senior dri jermal* ilo tore eo *senior dri jermal* eo ear jab maron ak ear jako jen an sign. Ilo wawein in, *Alap* Labwille ej kalikar lok an jenolok eltan pein ilo an sign einwot juon *alap* ilo tore eo jen an sign ilo etan *senior dri jermal* eo. Kin menin, Court in ej loe bwe ej juon wawein eo ej kwalok ke maron eo an *senior dri jermal* emoj ajelok nan juon laajrak eo ejenolok jen laajrak in bwij eo an *alap* – juon karkan laajrak eo ear ijino ibben Lemejeik ilo an walok ilo pepa in 1959 Land Determination eo an aelon in Majuro, im ej alikar einwot juon kein kamool an Riabnono eo ilo Plaintiff's Exhibit P-12. Kin un in, Court ej kile im boke *menmenbwij* eo emoj kalikare einwot juon kein kamool ilo Plaintiff's Exhibit P-13 eo im ej walok laajrak eo an bamle eo an Riabnono Kita im etan lollap ro rar kabwijer maron, Lemejeik im Branij.

5. Ak melele ko an Rijumae Abnono eo ej ba bwe maron eo an *senior dri jermal* ilo Lomelan ej bed ibben *bwij* eo an *alap* ro mokta lok einwot - Bale, Labwille, Dick Carmel, im Anna Carmel – einwot an alikar ilo menmenbwij eo emoj kalikar ilo kein kamool eo an Rijumae Abnono ak Defendant's Exhibit "B". Ekkar nan naan ko an Rikamool eo an Rijumae Abnono eo kein karuo, e eo ear kommane laajrak eo an bwij eo im ej kalikar ke ejelok uaan bamle eo an im lollap ro jimaan Kita ie kinke rejjab uaan bwij eo aer Lomelan ilo Batkan. Riabnono ro rar jab jumae melele kein im Court in ejjab loe notan menmenbwij kein an bamle kein jimor bareinwot melele ko ke rej itok jen kajojo laajrak ko rej oktak jen dron.
6. Ijowotke, melele ko an Rijumae Abnono eo ilo an ba bwe maron eo an *senior dri jermal* ej an wot *bwij* eo ej alikar laajrak eo aer ilo kein kamool eo Defendant's Exhibit "B" einwot rej idabtok ibben elon ian karkan laajrak ko ilo bwidej im koon ko nan kojerbali im emoj

buki einwot kein kamool ko an Riabnono ro im emoj an Court in kile ke rej jet kein kamool ko rej rie melele ko an Riabnono rein. Court in, einwot kemlet iumin *Rule 1101(d)(1)* ikijen kein kamool im rej alikar ilo kakien eo naetan, Evidence Act eo an 1989 eo, ej aikuij lelok elap jonak ko nan karokan laajrak ko rej komman jen “...ro rej kabwijer maron eo an *Iroiylaplap*, ak ilo an ejelok *Iroiylaplap*, ibben *Iroi-edrik* eo ikijen won eo ekkar bwe en kabwijer maron eo an *alap*, *senior dri jerbal*, *dri jerbal* ak maron ko jet...” ilo bwidej ko aer.¹

7. Ej alikar bwe tarlep in case in ej ikijen wot an *Alap* Winton jumae ribinej jenkwon Lawrence Kumtak einwot juon *senior dri jerbal*, im Court in ej loe, ej juon wawein eo *Iroiylaplap* eo ejjab rie im erra kake. Ej un eo im bedbed eo Court in ej loe bwe *Alap* Winton, ekkar nan Mantin Majol, ejjab jimwe im ekkar an make ian im ukot juon karokan laajrak eo emoj an kar komman jen 1959 eo – tarin 60 jima iio aetokan – ilo an ejelok un ko rekkar ak bedbed ko iumin Mantin Majol. Ne enaj, innem enaj jelet im kakure manit eo, *jab komakit drekein jenme eo. Lelwoj*; supra; *Jorbon v. Akira*, CA 2020-00329, (Lemnak im Uaak eo an Traditional Rights Court eo, 1/7/2022) ilo 4-5; *Jorbon v. Michael and Laelang*, Civil Action 2023-01720, (Lemnak im Uak eo an Court eo an Mani, 6/14/2025) ilo 10-11; *Tokjen v. Lodge-Lobju and Lodge-Ned*, CA 2018-00294, (Lomnak & Uaak eo an Court eo an Mani, 10/2/2023) ilo 9-10.
8. Ilo case eo an *Lelwoj*, supra ilo 7, Court in – ilo an bok melele ko jen Supreme Court eo ilo case eo an *Lokot and Kabua v. Kramer, et al*, 2 MILR 89 (1/29/1997) – ear ba bwe *alap* eo ilo case eo ejjab maron in ukot karok eo emoj kabine ilo an ejelok melele im erra ibben dron kake jen *senior dri jerbal* eo elkin 27 iio, im ilo an ejelok un ko rejimwe im ekkar iumin

¹ 28 MIRC (1989), §1101(d)(1): In respect to any weto, or part thereof, substantial weight shall be given to determinations by the person holding the title of Iroiylaplap, or if there is no Iroiylaplap, the title of Iroi-erik, as to who are the Alap, Senior Dri Jerbal, Dri Jerbal, and other title holders.

manit. Im ejja ilo wawein in wot, ilo case eo an *Lokot and Kabua v. Kramer, et al.*, Supreme Court eo ear kabine lok jemlok eo an High Court eo nan jolok case eo an riabnono ro ilo aer kajeon in kadriojlok rijumae abnono ro jen bwidej eo elkin an mootlok 15 iio – kin melele kein “...ilo an mootlok 15 iio jen tore eo rijumae abnono rein rar jukjuk im bed ilo bwidej in im ej wonlontak abnono in ibben riabnono rein ilo court ej juon wawein eo ejjab jimwe im ekkar...” (kameejlok nan kalikar).

Ejja ilo wawein in wot, ilo case eo an *Jorbon v. Akira*, CA 2020-00329, (Lemnak im Uaak eo an Traditional Rights Court eo, 1/7/2022); *Jorbon v. Michael and Laelang*, Civil Action 2023-01720, (Lemnak im Uak eo an Court eo an Mani, 6/14/2025), im *Tokjen v. Lodge-Lobju and Lodge-Ned*, CA 2018-00294, (Lomnak & Uaak eo an Court eo an Mani, 10/2/2023) ilo 9-10, Court in ear ba bwe ilo an ejelok un ko rejimwe ak ekkar iumin manit, oktak ko ilo laajrak ko ioon bwidej elkin juon tore eo eaetok jen *Irojlaplap* eo – ak *Alap* ilo jikin ko ejelok *Irojlaplap* ak *Iroj-edrik* ie – enaj kakure Mantin Majol eo ej kemlet bwe jen *jab komakit drekein jenme eo*. Im ilo case eo an *Zedkaia, et al., v. David and Antolok*, CA 2022-01264, (Opinion & Answer of the Traditional Rights Court, 8/6/2025), Court in ear loe bwe ilo an lellap eo jinen rijumae abnono eo jab komman an abnono iumin 30 iio ear juon wawein eo ej kalikar an erra kake karok eo ear komman jen *Irojlaplap* ro im ear kabojrake im boke maron eo an *senior dri jermal* jen ibben im ajelok tokelik nan bar juon armij eo ejjab uaan bamle ak bwij eo, im ej karokan juon koon kaal eo ejelok ear jumae iumin 15 iio. Ilo case eo, Court in ear bareinwot ba bwe elane enaj wor jumae nan karokan laajrak eo ilo an ejelok un ko rejimwe im ekkar iumin manit enaj kakure manit eo ej kemlet bwe jen *jab komakit drekein jemne eo*.

10. Im ilo tarlep in, Court in loe bwe melele ko an Rijumae Abnono Lomot ikijen an ba maron eo an *senior dri jermal* en bar rool nan *bwij* eo ewor likjab ie itok wot jen an wor idabtok in melele ko jen ibben *Iroiylaplap* einwot aer alikar ilo kein kamool kein, Defendant's Exhibit D (im ej kwalok juon karokan laajrak in bwidej ilo 2024 eo jen Leroij Esther ikijen *alap* im *senior dri jermal* ro an Lomelan Weto, Mwilbar Weto, im Arinbiji Weto), Plaintiff's Exhibit P-11 (juon leta kommane ilo 2023 eo jen Leroij Esther im ej kalikar ke Kita Zackios ej ribinej jenkwon Lawrence Kumtak), im Plaintiff's Exhibit P-14 (juon pepa kommane ilo 2025 eo im ej kamool nan High Court eo kin leta eo kommane im ej alikar ilo Plaintiff's Exhibit P-11). Pepa eo ekaal ian pepa kein ej pepa in kamool eo im ear komman ilo October 16, 2025 eo im ej kwalok ke ej rie leta eo ear kommane moktalok im ej kile Riabnono Kita einwot juon *senior dri jermal*) – pepa kein aolep rej idabtok ibben karokan laajrak eo ear droor eltan pein in sign ilo September 14, 2024 eo (Defendant's Exhibit D eo kwalok an *Iroiylaplap* eo kile Neti Bale Lemot einwot juon *senior dri jermal*).
11. Ilo raan ko ruo im ear komman ien ronjake eo, October 22 im 31, 2025, ejelok kein kamool ear itok imaan Court in im ej kalikar ke emoj an oktak ak bok jikin jemlok eo an *Iroiylaplap* eo im ekaal tata ilo – Plaintiff Exhibit P-14 – eo im ej kile Riabnono Kita einwot juon *senior dri jermal* ilo juon ian melan ko ilo Lomelan im ej unin case in rainin. Kin menin, Court in ej loe bwe mekarta ear wor ilo 2023 eo juon karokan laajrak jen ibben *Iroiylaplap* im ej kwalok ke Neti Bale Lomot ej *senior dri jermal* nan Lomelan Weto, ej alikar jen pepa in bwe ej juon karokan laajrak eo im ej jermal nan aolepen Lomelan. Court in ej loe bwe elane Neti Bale Lomot ej armij eo ejimwe im ekkar bwe en kabwijer maron eo an *senior dri jermal* ilo Lomelan Weto einwot an alikar ilo kein kamool eo an Rijumae Abnono ak Defendant's Exhibit "D", innem *Iroiylaplap* eo enaj kar kalikare ilo ien ronjake eo.

V. Melele Ko Emoj Loi & Kabine

12. Elkin etale pepa im naan in kamool ko, Court in ej loe bwe ejabwe kein kamool ko nan rie melele ko an *Alap* eo. Ak Court in ej loe bwe kein kamool ko, elkin liniri tarlepie, rej kalikar im rie melele ko an Riabnono eo ikijen an ba bwe maron eo an *senior dri jermal* rar ajelok nan Lemejeik ilo 1959 eo im elkin nan Branij, innem nan lollap eo jemen Riabnono Kita, Lawrence Kumtak.
13. Court in ej loe im kabine bwe elane ejelok un ko rejimwe im ekkar iumin manit nan ukot karokan laajrak eo emoj kabine 60 jima iio ko remootlok, innem *Alap* Winton ejjab maron, kin maron eo an make, in korool lok maron eo an *senior dri jermal* nan bwij eo.
14. Court in ej loe im kabine bwe einwot ke ej kora eo erittotata nejin Lawrence Kumtak, ekoba an *Irojlaplap* eo kile, Riabnono Kita Zackios ej e eo ejimwe im ekkar bwe en kabwijer maron eo an *senior dri jermal* ilo melan eo ilo Lomelan im lollap eo jemen, Lawrence Kumtak, ear bareinwot kabwijer maron eo an *senior dri jermal* ie.


Date: 11th December 2025



Grace L. Leban, Chief Judge



Nixon David, Associate Judge



Claire T. Loeak, Associate Judge